



यूहन्नाए

उस०कताव ओसरो चिथी

आव चिथी येसुए उसिस यूहन्नाए यायुं हुबोरालाई धुतनी पैऱ्यावराए ल्योनी जोगोइन्याए जूनी ओसरो ज़। नो धुतनी पैऱ्यावराए येसु परमेस्वरए साचो ओज़ा माःक, मिं मिन्सिद उहु ब माःक है यालिऱ्याव। अजम्बरी जुनी दैन्या ते युं हुप्यानी माःक, मिंए बुद्धीनी वाज़ दैसिऱ्या है ब यालिऱ्याव। है जैद मिंराए यायुंनी जो हुऱ्या हो ज़ दादी ब ताए है यालिऱ्याव। निताव पाँरालाई उल्लैदद्याद यूहन्नाए येसु खीस परमेस्वरनी मिं मिन्सिद हुव साचो ओज़ा ज़ लिद सर्द नैव (१ यूहन्ना १:१-३; ४:२-३)। फरी गे परमेस्वरए उमीर जैसिन्या ताकिन, युं सुहुपुद ओयेनर दाद ओललाई मया दाव ताके (२:३-६; ५:१-५)। ओल परमेस्वर ज़गै ज़गैव ओतावए गे उमीर मनी चुम चुमोल मालिद सतस ज़ ल्यो ताके (१:५-७; २:७-११)। परमेस्वर फरी उयुं गराँव, ओमया ल्यो ओतावए गे गेल ब हिताव ज़ ताव परिके (३:११-२४; ४:७-२१)। है जैद परमेस्वरलाई मया दाऱ्याव मिंए अजम्बरी जुनी दैन्या आस ब दोऱ्याव (३:१-३)।

अजम्बरी जुनी यान्या पाँ

१ नो ड़ादाकिन ज़ लिऱ्याव, आव गेर्नाए गे ज़ गेथैव, गेमीए ज़ गेरैःव, गेचिऊव, गेकुइए गेछापो अजम्बरी जुनीलाव पाँए जूनी ज़

है गेदाचिऱ्या। २नो अजम्बरी जुनी ओरैःवए गे नोलाई गेरैःके सोनो गे गोहाई गेएऱ्या। है जैद जेलाई नो अजम्बरी जुनीए था गेसथैचिऱ्या। नो ड़ादा परमेस्वर बाबुए ल्योड ओल्यो, हो ज़ गेल्योक रैःके। ३जेस सिप



गेताया लिद गेथैव गेरें:व पाँ ज़ जेलाई
गेसथैचिज़्या। हो ताकिन ची परमेस्वर
बाबु सोनो ओज़ा येसु ख्रीसस मनी
सिप गेताज़्या। ४ आव चिथी गेर्युँ होलाँ
घताक लिद सर्द गेने।

ज़गैवलाव येमदा बान्या

५ ओल ओल्योनी जो थैद गेने, हो
ज़ जेलाई गेसथैचिज़्या। हो पाँ आव
ज़ — परमेस्वर ज़गैव लिज़्या, नोस
चुम चुमो जात्त ज़ माले। ६ गे ओलस
सिप गेलिज़्या है गेलिज़्यावत ब चुम
चुमोलाव येमदा गेबाकिन ते साचो पाँ
मादाद धुत गेपाँव ज़ थेरिके। ७ खाली
ओल ज़गैवल उलिज़्याव मिताव
गे ब ज़गैवल गेबाकिन परमेस्वर
उमिनताव भरिरास खैद तोबो नै
में ब गेताज़्या। परमेस्वर ओज़ा
येसु ख्रीसए गेदोव पापए जूनी उभी
सोभोद उजिउ भ्ना:द ओयासिउए
छैवर गेताज़्या। ८ गे सुवाराए ‘डास
काता पाप ज़ माले’ है गेलिकिन ते
गेक्याँलाई गे ज़ धोका याद साचो
पाँ गेस माताए। ९ फरी, ‘डा पापी
ज़ डालिज़्या’ लिद गेमामोसिकिन
ते परमेस्वर गेदोव पापर प्राइँ
रास्दचाद मादान्या गेदोव येनरानी
छैवर जैसिज़्याव। नो येनत परमेस्वर
अधर्म मादोव, युँ हुबो ज़ लिज़्या।
१० फरी, ‘डा पाप ज़ डामादोए’

है गेलिकिन परमेस्वर ओपाँ गेस
माताद ओपाँ पल्लैद गेयो मिताव ज़
ताके।

२ अ परमेस्वर उमिनताव
डाबाबुज़ार, जे पाप मादान्याए
जूनी आव पाँ सर्द डायचिज़्या।
खाली सुवाराए कैताराक पाप जेदो-
किन परमेस्वर गेबाबुस पाँदचाज़्याव
गेत्याला तोबो लिज़्या — नो ओखत
माल्यो छैव येसु ख्रीस ज़। २ नोए
गेपापए सजा ओल ज़ फो-दचाद
परमेस्वरस सखैसिज़्याव। नो गेलाई
वाज़ मा:क, मानुवाताव मिँ भरिरालाई
मनी ज़।

परमेस्वर ओपाँ दाज़्याव मिँ

३ परमेस्वर ओपाँ गेदोकिन वाज़
‘परमेस्वरलाई ड़ासरेस्के’ लिन्या
गेसैज़्या। ४ ओया:ए वाज़ ‘परमेस्वर-
लाई ड़ासरेस्ज़्या’ है लिज़्याव मिँए
परमेस्वर ओपाँ ओमादोकिन नोस
साचो पाँ माले, धुत वाज़ लिज़्या।
५ खाली परमेस्वर ओपाँ दाज़्याव
मिँए ते परमेस्वर ल्योदाडाव ओमया
ओसयो-धुव मिताव ज़ लिज़्या। है जैद
परमेस्वरस गेखैव गेमाखैव ननी ज़
रें:ज़्या। ६ है जैद जोए ‘डा परमेस्वरस
खैव ड़ालिज़्या’ है उलिकिन नो मिँए
ख्रीसए ओदोज़्याव मिताव ब दाव
परिके।

पलाँवल लिङ्याव मिँ

७ डायुँलाव डानैँ डामेर, आव सर्द डाय्याचिङ्याव, जेमाथैताव सा:रो पाँ मा:क। डादाकिनकाव जेस लिङ्याव एकतार जेथैङ्याव पाँ ज़। ८ हैदी ब डा डासङ्याव पाँ ते सा:रो लिङ्या। आव ख्रीसए ओक्याँत रैँ:द ले, जेक्याँत मनी रैँ:ङ्या, काराव ल्यो ताकिन नो पाँए ज़ चुम चुमोलाई समैद पलाँ जैहुक्यो। ९ है जैद जोए 'डा नो पलाँवल डालिङ्या' है लिद परमेस्वरए उमिनताव ओनैँ-लाई ओसोकिन, नो मिँ आ:पै चुम चुमोल ज़ लिङ्या। १० जोए परमेस्वरए उमिनताव मिँलाई मया दोङ्याव, हो पलाँवल ओतावए नोलाई कान्त ज़ पर्दण्ण्या ओछ्यास माले। ११ नैँलाई सोङ्याव मिँ चुम चुमोल परिद 'आदा डाबाङ्या' लिन्या ब मासैँव। नोलाई माचाव ओयेनए मुन्दुक्यासो जैद नैव।

मानुवाताव पाँरादा युँ माभा:न्या

- १२ जे बाबुज़ारालाई सर्द डाय्याचिङ्या।
ख्रीसए उमिनए जूनी परमेस्वरए
जेपाप क्याल्दयाचिक्यो।
- १३ जे बाबुरालाई सर्द डाय्याचिङ्या।
जे भा:किन ज़ लिङ्यावलाई
जेसरेस्ङ्या।
- जे धापाज़ाकावरालाई
सर्द डाय्याचिङ्या।

जे सैतानलाई हारैद जेनै।
जे ज़िम्ज़ा लुज़ारालाई
सर्द डाय्याचिङ्या।
जे स्वर्गताव जेबाबुलाई
जेसरेस्ङ्या।

- १४ जे बाबुरालाई सर्द डाय्याचिङ्या।
जे भा:किन ज़ लिङ्यावलाई
जेसरेस्ङ्या।
- जे धापाज़ाकावरालाई
सर्द डाय्याचिङ्या।
परमेस्वरए ओपाँ जेयुँल
बास ओदोवए
जे थऱरिद सैतानलाई
हारैद जेनै।

- १५ जे आव मानुवाताव पाँरादा जेयुँ
ताभा:च्यो। नितावदा उयुँ भा:ङ्याव
मिँए ओमया परमेस्वरए ल्योदा माले।
- १६ आव मानुवाताव पाँर आवर ज़ —
जोत ब युँ मानैधुन्या, प्राईत ज़ मी
तून्या, नैँ मेँकिन कातानी डाघ्यो:के
लिद युँ थू जैन्या। आव सोम्लो पाँ
परमेस्वरनी हुव मा:क, मानुवाताव पाँ
ची। १७ आव मानुवा ते तछा ओपाँरास
ज़ खेम्रिङ्या। परमेस्वरए उयुँलाव
मिताव येन दोङ्याव मिँ ते खर्क ज़
खेमन्या माले।

ख्रीसकिन तँदाडावर

- १८ जे परमेस्वरए उमिनताव डाबाबु-
ज़ार, खेमन्या बेला यो:नाद ले।

हो बेला ओमाहुद ज़ ख्रीसकिन तँदाडाव हरिज़्या लिन्या ब जेसैज़्या-खेहो। आज्याल ब नितावर कुधु ज़ ताधुकेर। है जैद आव बेला ओखेम्नाव ननी ब रैःज़्या। १६नो ख्रीसकिन तँदा जैसिज़्यावर गेनी हाइसिद बावर ज़। खाली नोर गेस साचो लिज़्यावर माःक ओल्यो। गेस साचो ल्योर ताकिन हाइसिद माबाखेरहो। है जैद याबावए नोर गेसकावर माःक ओल्यो लिन्या रैःके।

२०जे ते नितावर माःक। जे ते ख्रीसनी छैव पुरूस दैद साचो पाँ जेसैज़्या। २१आव पाँ जेमासैए लिद डासज़्याव ते माःक, जेसैज़्या लिद ज़ डासरो ची। साचो पाँनी धुत मापुलुसे लिन्या ब तामेंःच्यो। २२‘येसु परमेस्वरए खतैद उपरीव ख्रीस माःक’ है लिद धुत पाँज़्याव सु? नो ‘येसु सोनो परमेस्वरनी ज़ा बाबुनी माःक’ है लिज़्याव ख्रीसकिन तँदाडाव मिँ ज़ सानी। २३जोए ‘येसु परमेस्वरए ओज़ा माःक’ है लिज़्या, नोस ओबाबु परमेस्वर ब माले। जोए ‘येसु परमेस्वरए ओज़ा ज़’ है लिज़्या, नोस ओबाबु परमेस्वर ब लिज़्या। २४जे ते डादाकिन ज़ जेथैव पाँलाई जेयुँल नैच्यो। नो पाँर जेयुँल जेनैकिन परमेस्वरए ओज़ा सोनो गेबाबु परमेस्वरसकावर तान्या जेले।

२५नो ओज़ा ख्रीसए ओल ज़ ‘अजम्बरी जुनी डायाचिरिज़्या’ लिद याका याद नैसिउ।

२६जेलाई बलेव पैज़्यावराए ल्योनी कसाराक भुकिज़्या लिद आव पाँर सर्द नैद डायाचिए। २७निताव उलिदी ब नो जेदैव परमेस्वरए उपुरूसए जेयुँल बास ओदोवए सुए ज़ जेलाई पैव मापरिए। होए साचो पाँ भरी ओल ज़ पैचिज़्याव, धुत पाँ मापैचिउ। है जैद होए ओपैचिउ मिताव ज़ जे ख्रीसए ओपाँत लिच्यो।

परमेस्वरए ओज़ार तान्या

२८है जैद बाबुज़ार, जे ख्रीसए ओक्याँत ज़ धिद ल्यो ताके। हो ताकिन ची फरी उहुव बेलाक होए ओड़ाक लाज मोर्नो तान्या गेमाले। २९ख्रीस छैव लिज़्या लिन्या जे ज़ जेसैज़्या। है जैद परमेस्वरए ओड़ाक चाव येन दोज़्यावर परमेस्वरनी जर्मिउ ओज़ार ताज़्यार लिन्या ब सैव ताके।

३ गेबाबु परमेस्वरए गेलाई बनै मया दाद ओज़ार जैसिक्यो। हैज़ गे ओज़ार ज़! खाली आव मानुवाताव मिँराए ओज़ालाई यामासरेस्ज़्यावए गेलाई ब मासरेस्सिर। २डायुँलाव डानें डामेंर, आखकिन ज़ परमेस्वरए ओज़ार ताद गेले। खाली अजम्बरी जुनील इताव गेतारिज़्या लिन्या ते



गेमासैए। आव वाज़ गेसैज़्या, ख्रीस फरी उहुक ओल किताव उलिज़्याव गे ब हिताव ज़ तान्या गेले। हो छचाम वाज़ ख्रीसलाई चबनै रँःन्या गेले। ३ है जैद जोए आव पाँत आस दोज़्याव, नो मिँए ख्रीस किताव छैँव उलिज़्याव, हिताव ज़ ओल ब उयुँलाई छैँव जैज़्याव।

४ कानुन माभैःन्या ज़ पाप। है जैद पाप दोज़्याव भरिए ते परमेस्वरए ओकानुन माभैःर। ५ ख्रीसस ते पाप काता ज़ माले। ओल ज़ नो गेदोव पाप समैदचान्याए जूँनी मिँ मिन्सिद हुके। ६ है जैद ख्रीसस लिज़्यावराए पाप दावका दाव मालेर। पाप दाव ज़ नैज़्यावराए ते ओललाई ब मारँःधुर, सरेःन्या ब मासरेःधुर।

७ अ डाबाबुज़ार, जे नो बलेःज़्यावराए यापाँत ताभुकिच्यो। जो मिँए साचो येन दोज़्याव, नो ख्रीस मिताव छैँव लिज़्या। ८ फरी जो मिँए असत दोज़्याव हो सैतानसकाव ज़ लिज़्या। सैतानए ओयेन भरी भाःकिन ज़ असतलाव वाज़ लिज़्या। है जैद नोए ओयेन समैदचान्याए जूँनी परमेस्वरए ओज़ा मिँ मिन्सिद हुके। ९ परमेस्वरए ओराजमैवराए याक्याँत ओल ओगेर यारैःवए पाप दावका दाव ज़ मालेर।

नोर परमेस्वरनिकावर यातावए असत दो ज़ मादोधुर। १० है जैद परमेस्वरए ओथोर सोनो सैतानए ओथोर आनी ज़ छुतिज़्यार — जोए असतलाव येन दोज़्याव हो परमेस्वरसकाव माःक। नै मेंलाई मया मादाज़्याव ब हो मिताव ज़।

तोबोए तोबोलाई मया दासिन्या

११ डादाकिन ज़ जेथैज़्याव परमेस्वरए ओपाँ आव ज़ — तोबोए तोबोलाई मया दासिन्या। १२ सैताननिकाव कयिनए ओभाइ हाबिललाई ओसैःव मिताव ते दान्या माःक। नो कयिनए ओल ओयेन माचाव, ओभाइए ओयेन चाव ओतावए ओभाइलाई सैःक्यो। १३ डानैँ डामेर, आव मानुवाताव मिँराए जेलाई यासोचिक हार तामानिच्यो।

१४ गे नैँ मेंलाई मया गेदोज़्यावए सिन्यानी पुलुस्द अजम्बरी जुनी दैन्याल हुद गेले लिन्या गेसैँज़्या। नैँ मेंए ल्योदा ओमया माल्यो मिँ ते सिन्या सजाल ज़ लिज़्या। १५ नैँ मेंलाई सोज़्याव मिँए उयुँल ओसैःधुव मिताव ज़ लिज़्या। जे ब जेसैँज़्या, मिँ सैःज़्यावए ओक्याँत अजम्बरी जुनी माले।



१६ ख्रीसए गेलाई मया ओदासिउ आनी ज़ रैं:ज़्या, गेजूनी उजिउ ज़ भा:दद्यासिक्यो। है जैद गे ब नैं मेंए जूनी जिउ भा:न्या ब तयार ताव परिके। १७ यो:व मिँए माथैव मायो:वलाई उयुँ मानाद ओमाचिऊकिन परमेस्वरलाई ब मया मादोव। १८ जे डाबाबुज़ार, नैं मेंलाई मया दान्या या:ए वाज़ मा:क, साचो येननी ब दाव ताके। १९ गे साचो पाँल गेलिज़्याव सैं गेमालिज़्याव लिन्या ब ननी ज़ रैं:ज़्या। साचो पाँल गेलिकिन परमेस्वरए ओड़ाक धुकक तान्या गेले। २० खाली गेयुँए ज़ गेलाई गेखत ल्यो ओथ:रैसिकिन परमेस्वर ते गेयुँकिन भन घ्यो:व लिज़्या। ओल ज़ प्राईं युँलाव पाँ सैंज़्याव।

२१ डायुँलाव डानैं डामेंर, गेयुँए गेलाई गेखत ल्यो ओमाथ:रैसिकिन परमेस्वरए ओड़ाक च्याँ:सिन्या गेयुँ भें:ज़्या। २२ फरी गे परमेस्वरए है ओल्यो भरी दाद उयुँलाव मिताव येनर गेदोकिन ओलस गेनिज़्याव भरी ब सयो:दद्यान्या ले। २३ प्राईरानी गे दाव परिन्या येन आव ज़ — ओल है ओदासिउ मिताव ज़ ओज़ा येसु ख्रीसए उमिनत गेयुँ हुपद गे गेल मया दासिन्या। २४ इतावनी परमेस्वरए ओपाँ भें:ज़्याव मिँ परमेस्वरस लिज़्या, परमेस्वर ब ओलस लिज़्या। है जैद

गेयुँल बास दाद नैज़्याव परमेस्वरए उपुरूसनी ज़ परमेस्वर गेस ज़ उलिज़्याव गेसैंज़्या।

परमेस्वरसकावर सोनो परमेस्वरकिन तँदाडावर

४ डायुँलाव डानैं डामेंर, 'परमेस्वरए उपुरूसनी डापाँ-ज़्या' है लिज़्यावरालाई प्राईंलाई तारापतिच्यो। डादा 'परमेस्वरनी हुव पुरूस सैं मा:क' लिद थ:रैद वाज़ यारापतिच्यो। परमेस्वरए उमिन कुद तँनी पैज़्यावर कुधु ज़ ताद लेर। २ जे ते परमेस्वरए उपुरूसनी पाँज़्यावलाई आनी ज़ सरेस्न्या जेले — जोए 'येसु ख्रीस परमेस्वरनी मिँ मिन्सिद हुव ज़' है लिज़्या, नो परमेस्वरए उपुरूसनी ज़ पाँज़्या। ३ जोए 'येसु परमेस्वरए ओज़ा ख्रीस मा:क' है लिज़्या, नो मिँ परमेस्वरए उपुरूसनी पाँज़्याव मा:क। नो ते ख्रीसकिन तँदाडाव पुरूस ची। नो हुरिज़्यावए उजूनी डादाकिन ज़ जेथैज़्याव, होए ओपाँ आज्याल ब रैं:धुके। ४ खाली जे ते, डाबाबुज़ार, परमेस्वरनिकावर ताद निताव पाँज़्यावरालाई हारैद जेरानै, काराव ल्यो ताकिन जेस लिज़्याव परमेस्वर मानुवात लिज़्यावकिन घेप्पा लिज़्या। ५ नोर आव मानुवातावर यातावए मानुवाताव पाँ ज़ पाँज़्यार।

मानुवाताव मिंराए नोराए यापाँ भैःज्या। ६गे ते परमेस्वरसकावर गेलिज्या। परमेस्वरलाई सरेस्ज्याव भरी गेपाँत हुज्यार। फरी जोर परमेस्वरए उमीर माःक, होराए आव गेपाँ माथैर। ननी ब परमेस्वरए उपुरूसनी साचो पाँज्याव सोनो धुतनी पाँज्यावनी छुतिज्यानी।

छुतलाई मया दान्या

७अ डायुंलाव डानै डामेर, जे जेल मया दासिच्यो। निताव येन दान्या परमेस्वरए ल्योनी ज़ हुज्या। है जैद नै नैल मया दासिज्यावर परमेस्वरनी जर्मिउर, परमेस्वरलाई सरेस्ज्यावर ताज्यार। ८परमेस्वर ओमया ल्यो लिज्या। है जैद ओमया माल्योए परमेस्वरलाई मासरेसो। ९परमेस्वरए गेलाई मया ओदासिज्याव आनी ज़ रैःज्या — गेलाई बाँचैन्याए जूनी तोबोका तोबो ओज़ा आव मानुवात परींद्यासिक्यो। १०छुतलाई मया दान्याए ओअर्थ आनी ज़ रैःज्या — गे परमेस्वरलाई मया गेदोव माःक, ओल परमेस्वरए ज़ गेलाई मया दाद गेपापए सजा फोःदचान्याए जूनी ओज़ालाई परींद्यासिक्यो। ११डायुंलाव डानै डामेर, परमेस्वरए गेलाई निताव मया ओदासिउए गे मनी गे गेल मया दासिउ ताके। १२परमेस्वरलाई सुए ज़

खर्क ज़ मारैःतार। हैदी ब गे गेल मया गेदासिकिन, परमेस्वर गेस उलिज्याव रैःज्या, सोनो ओमया गेक्याँत योःज्या।

१३परमेस्वरए गेलाई उपुरूस याद ओनैसिज्यावए गे ओलस गेलिज्या, ओल गेस उलिज्याव गेसैज्या।

१४सोनो गे ओलस ल्यो उसिसर ब 'परमेस्वरए आव मानुवातावरालाई बाँचैन्याए जूनी ओज़ा परींद ओयासिउ साचो ज़' लिन्या ओसाचीर गे ज़ गेलिज्या। १५जोए 'येसु परमेस्वरए ओज़ा ज़' है लिज्या, नोस परमेस्वर लिज्या, ओल मनी परमेस्वरस ज़ लिज्या। १६परमेस्वरए गेलाई मया ओदासिज्याव गेसैज्या, सोनो नत ज़ गेयुं हुप्ज्या।

परमेस्वर ओमया ल्यो लिज्या। गे ब ओल माँःती छुतलाई मया गेदोकिन गे परमेस्वरस गेताज्या, परमेस्वर ब गेस ताज्या। १७तोबोए तोबोलाई मया दान्यात परमेस्वरए ओमया चबनै रैःज्या। है जैद गे आज्याल ब ओल स्यासो गेलिज्यावए परमेस्वरए ओराफाल्रिज्याव छचाम ओड़ाक माछेःद ज़ गेयुं होलाँ जैद बान्या गेले। १८परमेस्वरए ल्योक रेंद बाज्याव मिं माछेःए। नो ओमया ल्यो ओतावए ओछचाचे भरी माज्या। 'सजा डादैया' है लिज्याव वाज़ छेःज्या। छेःज्याव मिंए परमेस्वरए ओमया मासैव।

१६ परमेस्वरए डादा गेलाई मया ओदासिउए गे ब तोबोए तोबोलाई मया गेदोऽया।

२० जोए ओयाःए वाज़ 'परमेस्वरलाई मया डादोऽया' है लिद परमेस्वरए उमिनताव ओनैलाई ओसोकिन, नोए ओपाँ धुत ज़ रेंऽया। ओल ज़ उरेंऽव नो ओनैलाई मया ओमादोकिन, ओमारेंऽयाव परमेस्वरलाई भन कै जैद मया ओदोधुरिऽयाव? २१ परमेस्वरए ल्योनी गेदैव दान्या पाँ आव ज़ — जोए परमेस्वरलाई मया दोऽयाव, होए नें मेंलाई ब मया ओदोवक।

परमेस्वरए ओसाची पतिन्या

५ जोए 'येसु परमेस्वरए खतैद उपरीव ख्रीस ज़' है लिद पतिऽयाव, नो परमेस्वरनी जर्मिउ लिऽया। सोनो जोए गेलाई जर्मैऽयाव गेबाबुलाई मया दोऽयाव, होए परमेस्वरए ओराजमैव ओज़ारालाई ब मया यादोऽयाव। २गे परमेस्वरलाई मया दाद ओपाँ गेदोकिन ननी ज़ परमेस्वरए ओराजमैव ओज़ारालाई मया गेरादोऽयाव गेसैऽया। ३परमेस्वरए ओपाँ गेदोकिन वाज़ परमेस्वरलाई मया गेदोऽयाव थरिऽया। ओल ओज़ारालाई ओपाँ दान्या खाव माले, भयासो लिऽया। ४काराव ल्यो ताकिन परमेस्वरए

ओज़ार ओलनी जर्मिउर यातावए आव मानुवाताव यालाई बले-व पैऽयाव पाँरालाई याराहारैऽयार। नो गेराहारैऽयाव ओललाई गेयुँ हुप्ट गेलिऽयावनी ज़। ५'येसु परमेस्वरए ओज़ा ज़' लिद पतिऽयावराए वाज़ मानुवाताव यालाई बले-व पैऽयाव-रालाई याराहारैधुऽयार।

६नो परमेस्वरए ओज़ा येसु ख्रीस मिँ मिन्सिद उहुव, रील ओसछैसिउ छचाम ब रेंऽके, उभी सोभोद उजिउ ओभाःव छचाम ब रेंऽके। ७आज्याल गेयुँल बास दाद नैऽयाव परमेस्वरए उपुरुसए ब होए ओसाची ज़ यासि-ऽयाव। नो पुरुसए साचो थरिउ पाँ वाज़ दोऽयाव। ८येसु परमेस्वरए ओज़ा ज़ लिद साची याऽयावर सोम्लो लिऽयार। तोबो परमेस्वरए उपुरुस, तोबो रील ओसछैसिउनी, तोबो उभी सोभोद उजिउ ओभाःवनी ज़। है जैद नो सोम्लोराए यासाची खैऽया। ९गे मिँराए यासाची गेपतिऽया, परमेस्वरए ओसाची ते भन थरिउ लिऽया। परमेस्वरए मिँरालाई साची ओराएऽयाव ओज़ाए उजूनी ज़ लिऽया। १०जोए ओज़ालाई उयुँ हुप्टऽया, होए परमेस्वरए ओसाची उयुँल रैद नैव। फरी जोए परमेस्वरए ओसाचीत उयुँ माहुबे, होए नो साचीलाई धुत थरैऽयाव, काराव ल्यो

ताकिन परमेस्वरए ओज़ाए जूनी ओयो साची मापतिउ। ११ गेलाई परमेस्वरए ओयासिज़्याव साची आव ज़ — गे मिँर अजम्बरी जुनी दैन्यार गेताज़्या, नो जुनी ओज़ाए ओक्याँत वाज़ लिज़्या। १२ जोए परमेस्वरए ओज़ालाई उयुँल रैज़्याव, होए ज़ अजम्बरी जुनी दैज़्याव। जोए ओज़ालाई उयुँल मारैव, होस अजम्बरी जुनी माले।

१३ आव डासरो चिथी जे परमेस्वरए ओज़ालाई जेयुँ हुपज़्यावराए जूनी सर्द डानै। आव चिथीनी ज़ अजम्बरी जुनी जेस उलिज़्याव सैन्या जेले। १४ परमेस्वरए ओपैज़्याव मितावनी गेन्निकिन 'गेन्निउ भरित थैदचान्या ले' लिद ओड़ाक माछेद ज़ बान्या गेयुँ हुप्न्या ले। १५ नो गेन्निउ भरित ओथैकिन नो भरी गेदैधुके लिन्या गेसैज़्या।

नैलाई पापनी सोवोल्न्या

१६ जेनी तोबो जेनैए पाप ओदोज़्याव जेसैकिन, नोए उजूनी पोखारिद जेएकिन, नोलाई परमेस्वरए बाँचैन्या

ले। नोए ओदोज़्याव पापनी माओल्द सिन्या सजादा ज़ ओबाकिन पोखारिद जेमाएदी ब ताए। १७ असतलाव येन भरी पाप ज़ लिज़्या। हैदी ब नो जेनेँ पापनी ओल्धुन्या स्यासो उलिकिनी, नोए जूनी पोखारिउ ज़ ताके।

१८ परमेस्वरनी जर्मिउ मिँए ते पाप दावका दाव माले लिन्या गेसैज़्या। परमेस्वरए ओज़ा ख्रीसए ज़ नोलाई पाथस नैद सैतानलाई बलेव मायो। १९ गे परमेस्वरनिकावर ज़ लिन्या गेसैज़्या। मानुवाताव भरी ते सैतानए उधुँल ज़ लिज़्यार। २० गे आव ब गेसैज़्या, परमेस्वरए ओज़ाए साचो परमेस्वरलाई सरेसो परीन्याए जूनी ओल ओक्याँत ज़ सरेसो परीसिक्यो। ओज़ा येसु ख्रीसनी साचो परमेस्वरस सिप गेलिज़्या। साचो परमेस्वर ब ओल ज़, अजम्बरी जुनी ब ओल ज़।

२१ डाबाबुज़ार, जे मिँराए याजैव अडग्यालाई 'आव ज़ ईस्वर' है लिज़्यावराए ल्योनी जोगोइसिद लिच्यो।